



Assaggi di Bisalta
portale linguistico e culturale dei territori della Bisalta

grafia Escolo dòou Po

La baia ëd Carneval

Ën prinsipi dël 1655 ël travai e ël tamp destinà a l'ourasioun dël counvant chertouzin a soun ëstèt butèe soutsouri dai gestàs ët na banda d'ëscapa da ca que a l'an fèt ët dësdezi que a soun arcordèe couma "la baia ët Carneval".

Ël jœves gras ët que an li sta ëscadra ët falabrac a l'é mountà a la Chertouza e a l'é ëntrèta ët forsa dinta ël prim vir ët muraiè dël counvant, criand tutasort d'ëmprouperi e dizand pian e fort lo que a vœziou fane di benefisi que ël re ou i avia garanti ai frèe. A l'an campà anària tute l'ëstansie robasiand tut lo que a troevavou e souritut l'ëstansia dël bërgé que a l'era piena ëd froumag pèrquè ënt ël mentre que a caminavou pèr mountà al counvant i joù a l'avìou chapà fam. A la sera a l'avìou nhant pœzù ëndasne pèrquè a i era calà aout ën ginoui ët fioca, parei après d'avé manjà e bevù ma ët crin a 's soun barounèe ënt l'ëstale ounda a l'an soupatà ënsima a na cuverta ën pòoure bërgé, coza que a qui tèmp là a l'era n'oufesa propi grosa.

Ël vendre l'ëscadra ët teste mate a forsa ët fâ a tourna a ca portandse après onhi bin di diou. Quicun di pi ëscapudèe ou l'a seguità a fa ët folarèe e ët dëspres: un ou l'a fèt vegue ël soue vèrgonhe pisand o fazand finta ët faou ënt ël capèl dël messo dël post e ët sourepi ou s'é dësgrupà ël caouse e après d'esse arvertià la camiza ës l'ësquina ou s'é virà coul cul patanù vèrs ël santouari e que gestàs si ou l'a fèt na prima vota vizin al mulin e ëncòu n'aouta vota d'aramba a la porta dël pount.

Ma a l'avìou ëncòu nhant finì. Qui dì pi tard mentre que a mountavou al counvant fasandse la via ënt la fioca, ël prioù e ël proucuratoù di Tet Pes a soun ëstèt brivèe e cariee d'ëmprouperi dai pi dësbelà. Ën mes après ël proucuratoù que ou calava da la Chertouza coun ën masé e ën cartouné ou l'é ëstèt fermà al porte ët La Chuza: ël masé que ou l'a fèt vegue na bruta bifa a l'an lasèt ësta ën pas, ël cartouné bounom al countrari a l'an campà ënt la paouta ounda a l'an caria ët crus e ët pate e a l'an fèt vene tut ënt ën nisoun.

Ënt ël mes d'agoust a forsa ët fâ a i é aruvà ël rapresentant dël re que ou i a fèt pagà na multa bin salâ. Da part soua l'ësnhour dël post ou fourtisia que ou l'avria brusà viou ël cap ët la banda dinta a soua ca se ou 's féise ëncòu afià a roumpe i chap ai chertouzin.